

CV.

*Le Prince d'Orange à Wesenbeke. Il désapprouve les projets desentreprises que quelques-uns au quartier de Wezel ont conçus. Il remercie le Sgr. de Hofwegen de son affection. Bodleian libr. Mss. St. Amand. 4 fol. 27.*

1571, le 19<sup>e</sup> Mai.

Wesenbeke, J'ay par le moien de Monsieur le Conte vanden Berch, mon beaufrère, receu une lettre vostre de l'unziesme de ce mois, et ung jour ou deux auparavant une aultre aussy par voye de Coloingne du IX<sup>e</sup> de cedit mois. J'ay veu toutes les particularitez que vous me faictes des occurrences de pardelà, dont je vous sçay bon gré. Mais quant aux entreprinses que vous me dictes se pratyquer en quelques endroitz de ce quartier là, j'en suis grandement esmerveillé vous vueillant bien dire tout ouvertement, que ce n'est seulement point par ma charge, mais que du tout j'en suis ignorant. Et ne me desplaist pour ce petitement, de veoir toutes ces indiscretions, par ou tant y a peu, que la cause en pourroit attendre aucun bien, que au contraire l'on rend d'aultant plus esveillé les ennemis pour estre aux escoutes. Mais c'est l'ordinaire d'aucuns des nostres lesquels pour se faire rire eulx mesmes se chatouillent volontiers.

J'ay esté bien fort aise d'entendre par vostre dicte dernière lettre, la bonne affection que démontre le Sr Hoffwegen à mon service. Dont je vous prie le remerchier de très bonne affection de ma part, et que en temps advenir je seray bien prompt pour le recognoistre vers luy avecq toute gratitude. Que si ce pendant il peult faire quelques bons offices envers le bailly son beaufrère dont vous m'escripvez, outre le bon service qu'il en fera à la cause commune, il se peult asseurer que ce me sera une des choses les plus agréables qu'il me sçauroit faire. Surquoy me recommandant de bon

coeur à vous, je prieray Dieu vous avoir en sa sainte  
garde. De Dillenberch ce XIX<sup>e</sup> jour de May 1571.

Vostre bon amy  
GUILLAUME DE NASSAU.

*A Mre Jacques de Wesenbeke  
Docteur en droict.*

R. Essen 27 Majj. respondi 30<sup>1</sup>.



**CVI.**

F. D. N. O. S. W. L. V. C. H. I. I.